

dopunama Poslovnika Općinskog vijeća koje su obuhvaćene prečišćenim tekstom.

Na osnovu člana 13. stav 4. Zakona o putevima Federacije BiH ("Službene novine Federacije BiH", broj 12/10, 16/10 i 66/13), člana 9. stav 1. tačka 5. Zakona o lokalnoj samoupravi ("Službene novine Kantona Sarajevo", broj 22/00 - Prečišćeni tekst), člana 23. stav 1. tačka 6. i člana 71. stav 1. tačka 2. Statuta Općine Vogošća ("Službene novine Kantona Sarajevo", broj 3/09 - Novi prečišćeni tekst, 52/12 i 28/13), Općinsko vijeće Vogošća, na sjednici održanoj 26.06.2014. godine, donijelo je

ODLUKU

O USVAJANJU PLANA ZIMSKOG ČIŠĆENJA PUTEVA NA PODRUČJU OPĆINE VOGOŠĆA U SEZONI 2014/2015. GODINE

Član 1.

Ovom Odlukom usvaja se Plan zimskog čišćenja puteva na području općine Vogošća, čije je održavanje u nadležnosti Općine Vogošća, u sezoni 2014/2015. godine, odnosno za period od 15.11.2014. godine do 15.03.2015. godine, a koji je sastavni dio ove Odluke.

Član 2.

Finansiranje zimskog čišćenja lokalnih i nekategorisanih puteva, čije je održavanje u nadležnosti Općine Vogošća vršiti će se iz Budžeta Općine Vogošća, a dio lokalnih puteva na području općine Vogošća čije je održavanje i zaštitu preuzela Direkcija za puteve Kantona Sarajevo, finansirat će Ministarstvo saobraćaja Kantona Sarajevo odnosno Direkcija za puteve Kantona Sarajevo.

Član 3.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-1267/14
26. juna 2014. godine
Vogošća

Predsjedavajući
Općinskog vijeća Vogošća
Esad Piknjač, s. r.

Na osnovu člana 40. stav 1. Zakona o prostornom uređenju ("Službene novine Kantona Sarajevo", broj 7/05) i člana 23. i 71. stav 1. tačka 2. Statuta Općine Vogošća ("Službene novine Kantona Sarajevo", broj 3/09 - Novi prečišćeni tekst broj 52/12 i 28/13), Općinsko vijeće Vogošća je, na sjednici održanoj 26.06.2014. godine, donijelo

ODLUKU

O PRISTUPANJU IZRADI REGULACIONOG PLANA "SVRAKE"

Vrsta Plana

Član 1.

Pristupa se izradi Regulacionog plana "Svrake", (u daljem tekstu: Plan).

Granice područja za koje se Plan radi

Član 2.

Granica obuhvata polazi od tromeđe parcela k.č. 314/6, 302/5 i 314/4, potom produžava na sjever te jugoistok idući međama parcela k.č. 302/5, 302/1, 302/3, 302/4, 296, 295/3, 284/2, 278/1, 279/1, 279/2, 272 (obuhvata ih) i dolazi do tromeđe parcela k.č. 272, 271 i 269. Granica obuhvata nastavlja u pravcu juga, te sjeverozapada idući međama parcela k.č. 272, 273/2, 276/2, 277/2 (obuhvata ih) i dolazi u četveromeđu parcela k.č. 284/2, 284/8, 277/3 i 277/2, potom nastavlja na sjeverozapad sijekajući u pravoj liniji parcele k.č. 284/8, 1762/4, 1762/2, te u idući u istom pravcu obuhvata parcele k.č. 293/4, 302/6, 302/5 i dolazi do mjesta odakle je opis granice i počeo.

Sve gore navedene parcele se nalaze u K.O. Svrake, Općina Vogošća.

Površina obuhvata iznosi P=1,8 ha.

Vremenski period za koji se Plan donosi

Član 3.

Plan se donosi za period do donošenja novog planskog dokumenta.

Smjernice za izradu Plana

Član 4.

Općina Vogošća je pokrenula inicijativu za izradu Regulacionog plana "Svrake" dopis broj 05-23-924/14 od 22.05.2014. godine.

Prostor koji je predložen za izradu Plana se angažuje za izgradnju zamjenskih stambenih jedinica za domaćinstva koja su u nedavnim elementarnim nepogodama usljed poplava i pokretanja klizišta u dijelu naselja Svrake ostala bez svojih domova. Predmetni prostor nije pokriven provedbenom planskom dokumentacijom, a prema Prostornom planu Kantona Sarajevo nalazi se u zoni stanovanja ("Službene novine Kantona Sarajevo", br. 26/06).

Cilj izrade Plana je donošenje provedbene planske osnove u utvrđenim granicama u članu 2. ove Odluke.

Po prijedlogu Općine, izgradnja u naselju Svrake će se vršiti na zemljištu označenom kao k.č. 272, 273/2, 276/2, 277/2, 278/2, 279/1, 279/2, 284/2, 293/1, 293/4, 295/3, 302/1, 302/3, 302/4, 302/5, 302/6 i 314/4 K.O. Svrake.

Kroz Plan je potrebno preispitati realne prostorne mogućnosti za izgradnju objekata stanovanja, između ostalog i zamjenskih stambenih jedinica za cca 20 domaćinstava, opremanje potrebnom komunalnom infrastrukturom, kao i kvalitetno saobraćajno rješenje.

Osnovna usmjerenja za izradu Plana su:

- Izvršiti ažuriranje i vektorizaciju geodetske podloge u razmjeri 1:1000. Uz geodetsku podlogu potrebno je obezbijediti i podatke o posjedovnom stanju i ažurnom katastru komunalne infrastrukture;
- Izvršiti istražne radove o inženjersko-geološkim i geomehaničkim osobinama terena;
- Planom je potrebno na zemljištu, planirati objekat kolektivnog stanovanja, spratnosti P+1 do P+2, rušenje postojećeg Doma kulture sa prostorijama mjesne zajednice, izgradnja novog stambeno-poslovnog objekta kolektivnog stanovanja spratnosti P+3 koji bi u prizemlju obezbijedio zamjenski prostor za MZ, Dom kulture i prostorije Fudbalskog kluba "Ozren";
- Planirati izgradnju novog trga sa parking prostorom, rekonstrukciju postojećeg nogometnog igrališta sa tribinama i svlačionicama i rekonstrukciju košarkaškog igrališta;
- Zadržati koncept saobraćaja iz plana višeg reda;
- Planirani razmještaj objekata i saobraćajno rješenje funkcionalno povezati u jednu urbanističku cjelinu;
- Urbanističko-tehničke uslove za izgradnju građevina usaglasiti sa prostornim mogućnostima, mrežom saobraćajne, te mrežom i kapacitetima komunalne i energetske infrastrukture.

Rokovi za pripremu i izradu Plana

Član 5.

Rokovi za izradu Plana su:

- Odluka o pristupanju izradi Plana: juni 2014. godine
- Ugovaranje i obezbjeđenje geodetske podloge: juni 2014. godine
- Osnovna koncepcija Plana: juni 2014. godine
- Nacrt Plana: juli 2014. godine
- Javni uvid i javna rasprava: juli 2014. godine
- Prijedlog Plana: juli/august 2014. godine

Način osiguranja sredstava za izradu Plana

Član 6.

Zavod snosi materijalne troškove izrade Plana a u okviru budžetom odobrenih sredstava za izradu provedbene planske dokumentacije na području Kantona Sarajevo.

Nosilac pripreme Plana i Nosilac izrade Plana

Član 7.

Nosilac pripreme Plana je Načelnik Općine Vogošća.

Nosilac izrade Plana je Zavod za planiranje razvoja Kantona Sarajevo.

Donošenje Plana

Član 8.

Nosilac izrade Plana izradit će Prijedlog Plana i dostaviti ga Nosiocu pripreme Plana. Nosilac pripreme Plana utvrdit će

Prijedlog Plana i podnijeti ga Općinskom vijeću Vogošća na donošenje. Sastavni dio Prijedloga Plana je "Elaborat orijentacionih troškova uređenja građevinskog zemljišta".

Ostale odredbe

Član 9.

Sastavni dio ove Odluke je grafički prilog sa ucrtanom granicom područja planiranja.

Član 10.

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-02-1268/14
26. juna 2014. godine
Vogošća

Predsjedavajući
Općinskog vijeća Vogošća
Esad Piknjač, s. r.